

UKAN-i jarriak

I

Izan zintezkeen txori
edota hegazkin,
lurrerako ez zara
sortua behinepin.
Gasteizeko zeruan,
Bilbon, nahiz Donostin
topa egin dezagun,
ekin, UKAN, ekin.



JOSU SANTESTEBAN

IV

Zara: aterki, plater,
sakeleko lapitz,
kamixeta, axota...
Ta hau zenbat aldiz!
Opariek euskaraz
egin al dute hitz?
Buruko mina daukat,
atxis! UKAN, atxis!

II

Lau hanka ta bost zero
ia jaio aintzin.
Koloretsua zara
baina ikustezin.
Birsortuko zarela
egin diezu zin.
Haginekin egizu
txin-txin, UKAN, txin-txin!

V

Mikrotik bafleraino
irriparra txuri.
kameraren aurrean
zabiltza urduri.
Lasai, zu zara... foko,
klaketa, irudi!
Salto, egizu, salto,
mugi, UKAN, mugi!

III

Pintxo ere bihurtu
zintuzten kanpañan
zintzurra goxatzeko
aurreko azañan.
Txotxa dantza ezazu
euskotar Dartagnan.
Platera hautsi gabe
ñam-ñam, egin ñam, ñam.

VI

Paretak margotzea
ez al da gutxitxo?
Zimenduei eusten
asko gabilta, txo!
Aspaldi dakigunez
“pixka bat, *es mucho*”
lo, lo egin ezazu
goxo, UKAN, goxo.